

# **Kimo-Kasper**

i su lucha kontra e sèlnan maligno di kanser

Idea i kuenta di Helle Motzfeldt

### Página 3

Konta!

Mi ta bai kontá'bo un kuenta, e kuenta di Kimo-Kasper i su lucha kontra e sèlnan maligno di kanser. Pero promé lo mi spliká'bo kiko un sèl ta. I mientras mi ta hasi esei, bo por wak e plachinan.

### Página 5

Wak, mi a pinta un mucha muhe i un mucha hòmber. Imaginá bo mes ku bo kurpa ta un kas chikitu. Rònt di bo tin kueru, meskos ku rònt di un kas tin muraya. Den bo kurpa tin kamer i han, meskos ku den un kas.

Tin un kamer kaminda bo kuminda ta bai, esei ta bo stoma. Bo kurason tambe ta un kamer ku ta pòmp sanger dor di henter bo kurpa. E sanger ta kore dor di e hannan- i pipanan chikitu. E hannan- i pipanan ei yama “vena”.

Naturalmente bo no por wak den bo kurpa asina asina. Pero bo por skucha si kiko ta pasa den bo kurpa. Por ehèmpel, si bo pone man riba bo pechu, bo por tende bo kurason bati. Bo ta tend'è? Anto tin biaha, ora bo tin hamber bo ta tende bo stoma gruña.

### Página 7

Meskos ku e murayanan di un kas ta trahá di blòki, bo kueru ta trahá di sèlsèl. Tur kos den bo kurpa ta konsistí di sèl: bo kabei ta konsistí di “sèlnan di kabei”, bo sanger di “sèlnan di sanger”, ètsétera. E sèlnan ta asina chikitu ku bo no por mira nan ku bo wowo so. Ta p'esei mi a pinta algun sèl pa bo, ya bo ta haña un idea kon un sèl ta. Bo por rekonosé un sèl di kabei? Dor ku bo no por mira nan, ta basta difísil pa komprondé kiko un sèl ta. Purba imaginá bo mes ku e sèlnan di bo kueru ta mesun duru pegá na otro ku e blòkinan di un muraya di kas.

Den bo venanan e sèlnan di sanger ta landa dor di otro. Kasi sigur bo a yega di mira kon sanger ta basha ora bo haña un herida òf kòrtá.

### Página 9

Riba e plachi aki bo ta mira ku tur e sèlnan ta kontentu. Nan ta alegre, nan por biba ku otro i nan ta duna otro suficiente espasio pa biba. Bo ta mira tambe ku tin sèl nobo ta bin aserka. Sèlnan nobo ta hopi chikitu ahinda. Pero nan tambe ta bira grandi i e ora ei nan tambe por traha sèl nobo.

sèlEn bèrdat abo ta krese, pasobra kontinuamente, ke mem kada biaha di nobo, bo kurpa ta traha sèlnan nobo aserka. Por ehèmpel bo kabei ta krese pasobra bo sèlnan di kabei ta traha sèlnan nobo aserka. Bo por bisa ku bo sèlnan di kabei ta multipliká.

### Página 11

Tin biaha ta sosodé ku un sèl ke hunga wega sushi. E ta hasi kos di mala mucha i ta tenta tur e otro sèlnan, paso e no ke biba huntu ku nan den bo kurpa, òf e ke tur espasio p'e so. Nos ta

yama un sèl asina un “sèl di kanser” òf un sèl kanseroso. Wak riba e plachi i mira kon malu e ta!

### Página 13

E otro sèlnan ta hopi rabiá riba e sèl di kanser. Paso e ta pusha tur e otro sèlnan un banda, e ta tenta nan i e no ta laga nan na pas. E sèl di kanser no ta tene kuenta ku e otro sèlnan, i e no tin kunen ku nada.

Anto bo sa kiko ta fèrfelu? E sèl di kanser tambe ta traha sèl nobo, meskos ku e otro sèlnan bon. Anto e sèlnan chikitu di kanser ta mes malu ku esunnan grandi. I den menos tempu ku kisas lo bo ta kere, tin masha hopi sèl di kanser mes.

### Página 15

E sèlnan di kanser ta forma un klòmpi huntu i nan no ta laga niun otro sèl yega serka di nan. E otro sèlnan tin ku sportá basta problema di e sèlnan di kanser, paso nan no por hasi kasi nada kontra di nan. Tin biaha e sèlnan di kanser ta bira asina hopi i forma un klòmpi asina grandi ku dòkter mester kit’e. Nos ta yama esei un operashón.

### Página 17

Danki Dios tin sèl di sanger ku ta ekipá ku hèrmèn spesial pa mata sèlnan di kanser. Ku nan hèrmènan nan por mata e sèlnan di kanser. Riba e plachi bo por mira kon un sèl di sanger ta bringa ku un sèl di kanser. Ora un sèl di kanser wòrdu eliminá, e otro sèlnan ta keda masha kontentu. Pero no ta tur biaha e sèlnan di sanger ta logra mata tur e sèlnan di kanser. Den un kaso asina ei nan mester di ayudo. E ayuda ei ta bini di Kimo-Kasper. E kuenta aki ta bai tokante di dje.

Skucha bon.....

### Página 19

Kimo-Kasper ta biba den hospital. Einan e ta landa den un bòter huntu ku su amigunan: Kimo-Carlos, Kimo-Karina, Kimo-Dennis i hopi otro amigu mas. Riba un día dòkter a yega serka Kimo-Kasper, i bis’e: “Man na obra. Mi a haña bishita di un hobensito, ku mester di boso ayudo. E tin hopi sèl di kanser den su kurpa. Su sèlnan di sanger ta traha nochi i dia pa mata e sèlnan di kanser, pero nan so no ta logra. I ta p’esei mi mester di bosnan”. “Ta bon,” Kimo-Kasper a kontestá, “nos ta kla. Amigunan ban, laga nos kuminsá mes ora”.

### Página 21

E dòkter a kue un angúa, i yena su tubu ku tur e Kimo-nan. Mes ora den e tubu dje angúa a bira hopi drùk , paso tur e Kimo- nan ke ta promé pa yuda e hobensito.

### Página 23

E hobensito ta drumí riba kama, wardando riba dòkter. Su nòmber ta Thomas.

Ela hala su deken te ribasu punt' é nanishi i e ta un poko nèrvioso. Thomas no por mira e Kimo-nan den e angúa, paso nan ta masha chikitu mes. Mes chikitu ku un sèl.

### Página 25

Poko poko e dòkter ta hinka e angúa den un di Thomas su venanan. Kimo-Kasper ta te dilanti. “Atáke, siguimi!” e ta bisa su amigunan, i e ta kore mes duru ku su pía chikitunan ta pèmitié. Di tur banda tur e bon sèlnan di kabei, sèlnan di sanger i sèlnan di kueru, ta grita: “Bon ku bosnan a bini! Yuda nos changa e sèlnan di kanser fèrfelu nan ei”. E sèlnan di kanser ta spanta i purba skonde òf kore bai.

### Página 27

Pero e sèlnan bon ta sera kaminda, pa asina e sèlnan di kanser no haña chèns pa skapa. Kimo-Kasper i su amigunan ta kaba ku e sèlnan di kanser un tras di otro. Tur e sèlnan bon ta bati man i nan ta kontentu. E Kimo-nan ta sigui bringa baliente.

### Página 29

Pero... Tin un problema chikitu. E Kimo-nan no por mira masha bon. Lo bo a ripará ku nan tur ta bisti brel. Asina ei nan por rekonosé e sèlnan di kanser mas mihó.

Tin biaha nan ta kore asina duru, ku nan ta trompeká, pèrdè nan brel i nan no por mira dje bon ei mas. Si esei pasa tin biaha nan ta bruwa i kome algun di e sèlnan bon di Thomas.

### Página 31

Atá, wak kiko a pasa: e Kimo-nan a kibra e sèlnan di kabei di Thomas. Riba e plachi bo ta mira kon derepente asina Thomas a pèrdè tur su kabei. Ela keda tur babuká. Naturalmente lo bo sintí'bo masha straño si derepente bo kabei kuminsá kai. Danki Dios e sèlnan ku a sobra ta traha sèl nobo, ku ta pone Thomas su kabei krese bèk.

### Página 33

Algun dje Kimo ku tabata traha den Thomas su stoma, a kore pèrdè i nan a kibra un par di Thomas su sèlnan di stoma. Ta hopi fèrfelu si bo sèlnan di stoma wòrdu ataká. Asina fèrfelu, ku Thomas ta mária, loke ta pone ku e tin ku saka.

### Página 35

Ora tur e sèlnan di kanser disparsé e Kimo-nan ta kansá pero satisfecho paso nan a hasi nan trabou bon. Nan ta sali for di Thomas su kurpa. Niun hende sa na unda nan ta bai. Portá nan ta bai bèk nan país Tera Kimo, kaminda e Kimo-nan ta wòrdu trahá.

Tin biaha tin sèl di kanser ku ta logra skonde dje bon ei, ku e Kimo-nan no por haña nan. Abo por diskubrí un dje sèlnan di kanser riba e plachi? Dor ku e sèlnan di kanser ta kampion den skondementu, Thomas mester sigui bai kontrolá na hòspital, te ora ku dòkter tin sigur ku no tin niun sèl di kanser mas.

### Página 37

Bo a gusta e kuenta di Kimo-Kasper? Si? E ora ei sera bo wowo i imaginá bo mes Kimo-Kasper trahando huntu ku su amigunan, Kimo-Carlos, Kimo-Karina i Kimo-Dennis. Bo ta mira kon huntu ku bo sèlnan di sanger nan ta bringa kontra di e sèlnan di kanser i kaba ku nan?

Talves abo i bo yu lo sinti un sostén dor di e buki aki. Si bo bira miembro di e sosiedat ‘Ouders, Kinderen en Kanker’ (VOKK), na bo turno lo bo sostené otro mayornan i nan yunan. Inskribí awe mes komo miembro ([bureau@vokk.nl](mailto:bureau@vokk.nl) òf telefòn 030 2422944). Tur kwartal lo bo risibí nos revista ‘Attent’ i tambe bo por bestèl mayoria di nos edishonnan. Bo ta paga solamente gastunan di pòst.